

**ՀԱՅ ՕԳՆՈՒԹԵԱՆ ՄԻՈՒԹԵԱՆ ԳԱՆԱՏԱՅԻ ՇՐՋԱՆԻ ՀԻՄՆԱԴՐՈՒԹԵԱՆ
25-ԱՄԵԱԿԻ ՃԱՇԿԵՐՈՅԹ-SՕՆԱԿԱՏԱՐՈՒԹԻՒՆ**

Հայ Օգնութեան Միութեան Գանատայի Շրջանի հիմնադրութեան 25-ամեակի ճաշկերոյթ-տօնակատարութիւնը տեղի ունեցաւ ուրբաթ, 26 Յունիս 2015-ին Le Cristal հիւրանոցի շքեղ սրահին մէջ: Ձեռնարկը կը վայելէր հովանաւորութիւնը Գանատայի Հայոց Թէմի Բարեջան Առաջնորդ Գերշ. Տ. Մեղրիկ Սրբ. Եպս. Բարիքեանի եւ նախագահութիւնը՝ ընկհ. Վանուհի Իսաջանեանի: Ներկայ էին նաեւ Սուրբ Յակոբ Առաջնորդանիստ Մայր Եկեղեցւոյ Հոգեւոր Հովիւ Գերշ. Տ.Սուրեն Սրբ. Եպս. Գաթարոյեան, Հ. Հ. Արտակարգ եւ Լիազօր դեսպան տիար Արմէն Եկանեան եւ տիկինը, ՀՕՄ-ի Կեդրոնական Վարչութեան փոխատենապետուհի՝ Ընկհ. Նայիրի Շահինեան, ՀՅԴ Գանատայի Կեդրոնական Կոմիտէի ատենապետ՝ Ռաֆֆի Տօնապետեան եւ տիկինը, Մոնթրէալի Քաղաքապետարանի ներկայացուցիչ՝ ընկհ. Մարի Տերոս, ինչպէս նաեւ ուղեկից միութիւններու ներկայացուցիչներ, Գանատայի զանազան շրջաններէն ՀՕՄ-ի պատգամաւորական ժողովի մասնակիցներ, եւ մեծ թիւով ՀՕՄ-ի առաքելութեան հաւատացող եւ քաջալերող ազգայիններ:

Գանատայի, Հայաստանի եւ ՀՕՄ-ի քայլերգներու ունկնդրութենէ ետք օրուան հանդիսավար՝ ընկհ. Զեփիւռ Ասատուրեան իր բարի գալուստի խօսքէն ետք յատկապէս անդրադարձաւ քսանհինգ տարիներ առաջ հիմնուած ՀՕՄ-ի Գանատայի շրջանի տարած բեղուն աշխատանքի մասին նշելով, որ “ Թէեւ նորեկ իր շրջանին մէջ բայց արհեստավարժ ու համարձակ քայլերով ՀՕՄ-ը ծրագրեց ու յաջողութեամբ պսակեց իրեն վստահուած ու իրմէ ակնկալուած իւրաքանչիւր ծրագիր” : Ապա ան հրաւիրեց ՀՕՄ-ի Գանատայի Շրջանային Վարչութեան ատենապետուհի՝ ընկհ. Սեդա Մալխասեան փոխանցելու իր խօսքը: Ընկհ. Մալխասեան առաջին հերթին գոհունակութեամբ տեղեկացուց որ նոյն օրը արդէն սկսած էր ՀՕՄ-ի Գանատայի Շրջանի պատգամաւորական ժողովը մասնակցութեամբ Գանատայի տարածքին գործող մասնաճիւղերէն եկած 57 պատգամաւորներու: Ան մաղթեց որ ՀՕՄ-ի 105-րդ ու Գանատայի 25-րդ ժողովը ըլլայ յաջող ու արդիւնաւետ:

Նախքան հանդիսութեան նախագահը բեմ հրաւիրելը, ընկհ. Ասատուրեան հանգամանօրէն ներկայացուց բազմավաստակ ընկհ. Վանուհի Իսաջանեանի կենսագրականը ու անոր տարած ծաւալուն ու ազգանուէր աշխատանքը: Ան նշեց, որ ընկհ. Իսաջանեան ծնած է Հալեպ: Հայ ազգին ծառայելու պատրաստակամութիւնը առաջնորդած են զինք ստանձնելու բազմաթիւ կարեւոր վարչական պաշտօններ. Մոնթրէալի մէջ ան եղած է Մոնթրէալի մասնաճիւղի ատենապետուհի, ապա ՀՕՄ-ի Գանատայի Շրջանային վարչութեան առաջին ատենապետուհի եւ աւելի ուշ ան ստանձնած է ՀՕՄ-ի

Կեդրոնական Վարչութեան ատենապետութիւնը: Հանդիսավար ընկհ. Ասատուրեան նաեւ կարդաց ընկհ. Վանուհիի ստացած շքանշաններու ու գնահատագիրներու տպաւորիչ ցանկը:

Կենսագրականի ընթերցումէն ետք ծափողջոյններու տարափին տակ բեմ բարձրացաւ «Մեսրոպ Մաշտոց» շքանշանակիր եւ Քէպէքի «տիպար քաղաքացի» ընկհ. Իսաջանեան: Ան առաջի հերթին ողջունեց Հ.Հ. դեսպան պրն. Ա.Եկանեանը ըսելով, որ “Ձեր ներկայութիւնը մեզ կը յուշէ թէ կտոր մը Հայրենիք կայ մեր մօտ այսօր”. ապա ան ներկայացուց ՀՕՄ-ի տարած ազգօգուտ գործունէութիւնը Հայրենիքի, հայկական գաղութներու, ինչպէս նաեւ որպէս բարեսիրական կազմակերպութիւն իր համեստ միջոցներով աշխարհի կարօտեալներուն բերած մարդասիրական աշխատանքը: Ընկհ. Իսաջանեան նաեւ անդրադարձաւ ՀՕՄ-ի մասնակցութեան՝ Միացեալ Ազգերու Կազմակերպութիւններու յանձնախումբերու մէջ: Ան շեշտեց ՀՕՄ-ի շարքերէն ներս երիտասարդներ ներգրաւելու կարեւորութիւնը, սակայն յիշեցուց որ միշտ պէտք է արժեւորել նախկին ընկերուհիներու աշխատանքը եւ օրինակ քաղել անցեալէն:

Ընկհ Վ. Իսաջանեանի ելոյթէն ետք հանդիսավար ընկհ. Ասատուրեան հրաւիրեց Գանատայի Հայոց Թէմի բարեջան առաջնորդ Տէր Մեղրիկ Սրբ. Եպս. Բարիքեանը փոխանցելու իր սրտի խօսքը: Սրբազան Բարիքեան անդրադարձաւ ՀՕՄ-ի տարած բեղուն գործունէութեան մասին, յաջողութիւն մաղթեց յառաջիկայ ծրագիրներուն, ապա օրհնեց սեղանները:

Հաճելի եւ ընկերական մթնոլորտի մէջ շարունակուեցաւ երեկոն: Ընկհ. Ասատուրեան ընթերցեց ՀՕՄ-ի Գանատայի Շրջանային Վարչութիւններու ձեռնարկի ներկայ անդամներուն անունները, որմէ ետք ան հրաւիրեց ՀՕՄ-ի Կեդր. Վարչութեան փոխ-ատենապետուհի ընկհ. Նայիրի Շահինեանը փոխանցելու իր խօսքը: Ընկհ. Շահինեան շնորհաւորեց 25-ամեայ ՀՕՄ-ի Գանատայի շրջանը, դրուատեց տարուած աշխատանքը նշելով որ Գանատայի «շրջանը միշտ եղած է գործունէայ ու աշխոյժ լաւագոյն շրջաններէն մէկը»:

Յատուկ գնահատանքի արժանի է հանդիսութեան կազմակերպիչ յանձնախումբը իր ներկայացուցած բարձրորակ գեղարուեստական յայտագրին համար: Արդարեւ բացառիկ կատարողութեամբ ելոյթ ունեցան տաղանդաւոր Ալինա (դաշնակ) եւ լինէթ (ջութակ) Իսրայիլեան քոյրերը: Ներկաներուն համար իսկական հաճոյքի եւ հպարտութեան առիթ էր ունկնդրել երիտասարդուհիներուն մեկնաբանած դասական երաժշտութիւնը: Գեղարուեստական յայտագրին իր մասնակցութիւնը բերաւ նաեւ գաղութիս ծանօթ ասմունքող Անահիտ Պալեան, որ խոր ապրումով ասմունքեց Գեորգ Էմինի “Սասունցիների Պարը”. ասմունքին ընկերակցեցաւ Համազգայինի Մոնթրէալի Սանահին Մասնաճիւղի “Անի” պարախումբը ու այսպէս խօսքն ու

պարը եւ խանդավառ երաժշտութիւնը իրար միաձուլուած՝ թնդացուցին սրահը ու մեր բոլորին սրտերը:

Մոնթրէալի քաղաքապետարանի անդամ ընկի. Մարի Տերոս ընթերցեց Մոնթրէալի Քաղաքապետի պրն. Տէնի Քոտէրի շնորհաւորական գնահատագիրը: Այս առիթով տիկին Տերոս իր կարգին, նաեւ իր կողմէ Շրջանային Վարչութեան փոխանցեց շնորհաւորական յուշատախտակ մը:

Ձեռնարկի աւարտին խօսք առաւ Հ.Հ. Արտակարգ եւ Լիազօր դեսպան տիար Արմէն Եկանեան: Ան շնորհաւորեց եւ դրուատեց ՀՕՄ-ի տարած աշխատանքը Գանատայի եւ յատկապէս Հայրենիքի մէջ եւ մեծապէս գնահատեց ՀՕՄ-ի անդամներու նուիրումն ու ազգօգուտ գործունէութիւնը:

Նախքան հանդիսութեան աւարտը ընկի. Ասատուրեան, որ մեծ ձեռնհասութեամբ վարեց հանդիսավարութիւնը, շնորհակալութիւն յայտնեց գեղարուեստական յայտագրի մասնակցողներուն, ձեռնարկի յաջողութեան սատարողներուն եւ բոլոր ներկաներուն:

Ներկաները մեկնեցան սրահէն “Ժողովուրդիս հետ, Ժողովուրդիս համար” ՀՕՄ-ի նշանաբանով: